



13. maj 2019

UPA 2019/118

Atassut

Siverth K. Heilmann

Qanoq iliorluni nunatsinni inoqarfiit inuerukkiartortut, inuerukkiartornerisa illuanut saatsinnissaa pillugu apeqquteqaat aallaavigalugu Inatsisartunut oqallisissiaq.

(Inatsisartunut ilaasortaq Jess Svane, Siumut)

Nunaqarfiit, illoqarfiit mikisut, sumiiffiillu isorliunerusut inooriaatsikkut kulturikkullu inuiattut ilutsinni eriagisassaraagut tammatsaalisassaralugillu. Ineriartupiloornerup, inooriaatsip, pinngortitarsuullu allanngoriartuaarneranut attuumassuteqarluinnarpoq.

Una oqallisissiaq pingaaruteqaqaaq Inatsisartuni eqqartussallugu, qanorlu nunatsinni najugaqariaatsikkut suna siunnerfigissanerlutigu eqqartussagatsigu. Qularnanngilarlu misigissutsit atorlugit oqaaserpassuit anninneqarumaassammata, Atassummiit kaammattuutigiinnassavarput ammasumik assigiinngissutsigullu ataqqillugit una oqallinneq atorumaaripput.

Atassummiit inuup namminiussusia kiffaanngissuseqarneralu ataqqilluinnarparput. Oqarfiginngisaannassavagullu inuit sumi najugaqassanersut. Inuup nammineerluni periarfissani malillugit najukkani toqqartarpaa, nunaqarfimmiikkusukkuni illoqarfimmiikkusukkuniluunniit. Isumaqaanngilagut pisussaaffigissagipput sumiiffinni inuerukkiartornera akiorniassallugu, inuussutissarsiornikkut tunngavissaalatsisoqarsimassappat.

Uagulli pisussaaffigaarput sumiluunniit nunatsinni, inuit illoqarfimmiippata nunaqarfimmiippataluunniit inuussutissarsiornikkut siuarsarusuttut tapersortuassallugit periarfissaqartissallugillu. Pisussaaffigaarputtaa qeqqinnissaqarfipput, atuarfiit, allallu pisussaaffigut kommunemiikkutta inatsisartuniikkuttaluunniit pitsaanerpaamik nuna tamakkerlugu sullittuassallutigit.

Inuiaat ataasiuvugut, nuna tamakkerlugu ineriartorfiusinnaasut tamakkiisumik ineriartortikkumavagut, nunaqarfinnik ineriartorusuttunik killileerusunngilagut. Assinganillu illoqarfiit ineriartortut killilersussanngilagut.

Atassummiit nunatta iluani nunattalu avataanut tunisassiornikkut niuernikkullu aporfissaararpassuit killilersuutaasartut annikillisarumavagut sumiluunniit inuussutissarsiorneq siuarsarumallugu. Aalisarnikkut, takornariaqarnikkullu, misigisassaqaartitsinikkut isumassarsiarpassuit qularnanngitsumik maani eqqartortillugit pingaarnerpaaq tassaavoq, nutaaliorusussuseq, aallartisaanerlu suugaluarpalluunniit inatsisinik killilersugaavallaannginnissaa.

Qanga siulivut ataqqingaarlugit eqqaasarpagut kalaaliussuserpullu tulluusimaarutigalugu. Siuligummi nammineerlutik pinngortitarsuaq naalagaralugu, piniagassallu malittaralugit inuupput. Ullutsinnilu nunarsuarmi sumiluunniit suliffissat periarfissallu malillugit nuttarneq, nunap



ineriartorneranut aningaasaqarneranullu iluaqutaasoq soorunalimi aamma nunatsinnut atuuppoq. Assersuutiginnarsinnaavagut Nuup avataaniittuni Aasiaat aamma Kullorsuaq innuttaqqortusiartortut qimerluualaarneqarsinnaapput.

Immikkoortissinnaasariaqarpagulli inuiaqatigiinnut toqqaannartumik nunatsinnullu iluaqutaasussanik ineriartortitsisussanillu aalajangiineq, kiisalu symbolpolitiskiusunik taaneqarsinnaasut, tassa kusassaataannartut aalajangiinaveersaarnissaq. Taakkumi inuiaqatigiinnut susassaqtitsinikkut, suliffissaqartitsinikkut ineriartornikkullu toqqaannartumik iluaqutissartaqanngimmata qulaatigullu kusassaataannartut, immaqaluunniit aningaasartuuteqarnerulernermik kinguneqarsinnaammata.